

【線上學習】李秉璋原作

神奇、神奇真神奇，上課毋使攏，交通毋會塞，想討學麼个，即學麼个。先生在佢擇，時間在佢選，三更半夜嘛會用，先生講了心色擋分明。佢會用係學生个先生，嘛會用做先生个先生，總講佢桃李滿天下，毋使準備拜師禮，毋使納學費，你想討學，佢即會教。

毋管你係巧神<sup>1</sup>抑係預顛<sup>2</sup>，佢攏收。佢無擇學生、無擇時間、無擇所在，單單擇你，擇你想討學个心。這係學習個革命，這係時代個轉變。來了急、來了緊，踰會著大進步，若像軀身胥有仙人指點，武功大進。

馬桶毋會曉修理有人教，鍊鋸毋會曉發，一步一步來，秘訣<sup>3</sup>教你知。網路線個接頭線路毋會曉排，有人教你色地愛分明，五花六色照順序，工具擋特別，頭尾一下拋夾落去，接頭插落網路通。

雖然講一個銀角毋會響，毋過先生大部分攏係自家在唱戲，

講到嘴角全波，精神飽滿，歡頭喜面，若像攏毋會慄擋有耐心！一遍教毋會曉，擋教一遍，你想討學幾下回即學幾下回，學到你自家毋莫。

千里緣分一線牽，天下盡在佢彈指。現代生活真舒適，冷氣吹，彈指間，毋使出門、毋使尖車，想討仰子學即仰子學。就算係疫情時務，學校个線上教學，有淡薄無恁自由，毋過嘛有人全然認真，著面聽課，著面查資料，正經係講一知三，師傅渡入門，修行在個人。上課講義自家留，毋使抄，三個快速鍵一抑<sup>4</sup>，滑鼠一籠，講義隨留落來。

當日上課紀錄先生有錄製。驚你單單係「用手機上課定」，人毋知走哪位去。所以先生上課會問問題，一半問，一半係在點名，睜你心思有在無？認真上課个，回答無問題擋會講頭即知尾，無用心个嘛無問題，平平無問題，這個係毋知半件，所以無問題。連先生喊佢回答，佢若像在人間消失，無鏡頭、嘛無回答聲，訊息欄上嘛無留字，所以佢正經係「用手機上課定」。

線上學習，成就隨在人，逐儕有擇個自由，即愛對自家個人生負責。對自家未來正經個慷慨，即係拋一切攏貢獻得現時。今日个佢，成就韶日個佢。

<sup>1</sup> 巧神：音 kioo^ shin`；聰慧，屬具特殊能力的聰明。

<sup>2</sup> 預顛：音 ham men；形容人笨拙魯鈍。

<sup>3</sup> 秘訣：音 bi^ quad`；訣竅，指事物的要領、竅門。

<sup>4</sup> 抑：音 ed`；按、手用力向下擠壓。

【火燒山崙】李宜諭原作

在莊下，鬧鬧熱熱个舊曆年一過了，又伸恬靜个生活。毋過，行過消防隊个時，會睜著遐一臺一臺个消防車駛出車庫歇在路脣，雖然睜毋會著無間挾掣个身影，嘛聽毋會著緊張刺耳个警報聲，毋過，空氣內底有藏一息仔討停動个電波，一種神經擲緬个氣氛。

舊曆二月係美濃人掛紙个時節，恁多年天氣反常，春雨慢到，二月个山崙燥批批，所以，第一個拜六掛紙个烏昏開始，就會睜著山崙面上出現沖天个煙，接落來紅紅个火光就透出來啊——阿依哦，火燒山崙啊！消防車个身影像走相捎恁從歸路，警報聲在街路咻個過，一臺、兩臺、三臺……歸下出動啊，毋過，偎暗過後即難啊，高不將換手腳溜掠个阿兵哥，擎鐮鐵、刀嫋拏就近个竹頭、樹、草荆莫——斷火路。

第二日打早，「轟……咑咑咑咑、咑咑咑咑」直升機个聲音就在天嶺來來去去鳴無歇睱。「直升機去美濃湖舀水啊哦！」美濃湖黏時鬧熱起來，大家較緊號<sup>1</sup>一個好位，坐落來慢慢子睜躊直

<sup>1</sup> 號：音 hoo；佔。

升機在湖面舀水个景象。遠遠飛過來个直升機，討到位美濃湖個時，就會慢慢仔降落來，等到食肚下个大隻袋揆著<sup>2</sup>水面，佢就會較緊拏袋向前拖一下正攔揪起來，滌滌一大袋个水即吊起來啊，續落拏這恁大袋个水搖搖晃晃吊到廣善堂後背个山崙面上，對半天高漕落來，恁大袋个水隨化做一臨白白个濛煙散淨淨。

天嶺个直升機一擺又一擺、對打早飛到偎暗；山脚下消防車个水一笕又一笕直直射；山崙上紅紅个影跡對山前擴散到山背、對山坪延到山嶺。更深夜靜个暗頭，總會聽著竹頭燒到劈哩趴啦<sup>3</sup>響個聲，火屎就踰風滿哪位飛，天光个時，家家屋屋个屋嶺、大路上、田底跌啊攏係烏烏个火屎。山崙个火日夜燒，山下个消防車、救護車、阿兵哥嘛日夜顧……一半下伸沖天个白煙，大家想討歇睱一下个時，紅紅个火舌<sup>4</sup>嘎又好定泥竄出來<sup>5</sup>，就恁一直愛燒到掛紙煞。

火燒山崙對環境、對山林个破壞十分大，睜著荆竹頭个阿兵哥得竹笏劃到手和面攏流血流滴，實在得人毋盼，掛紙個方式係毋係鄉親愛好好來思考、參詳咧？

<sup>2</sup> 揆著：音 dud` choo；碰觸到。

<sup>3</sup> 劈哩趴啦：音 pi li pa la；竹子燒裂的聲音。

<sup>4</sup> 火舌：音 foo` shed`；火焰的頂端。

<sup>5</sup> 竄出來：音 con` chid` loi`；鑽出來。

編號 3 號

【鷄婆飛啊飛】張瑞玲原作

打早，日頭正對東片裡鷄婆嘴<sup>1</sup>个後背升起來，金黃又晟目个金線射入天嶼。僕較緊蹬遐臺一騎即鳴歸路个老鐵馬，來到僕个百果園，猶想講今日日頭一出來即到位，算真早啊！無想著，正蹬入園內，隔壁種大梨个阿權哥即在遐大聲咻啊！「喂！日頭恁高啊正到位哦，敢做有事？」

唉！僕攏恁早啊，猶輸佢，這個阿權哥係歸暗夜毋使睡係無？做麼個會用七早八早即來到位咧？心肝猶在想，嘴又毋肯認輸，對嘴即應佢：「無啦！毋係來做事，係來睜鷄婆个啦！」

僕个林園在山龍圍核个窩內，若堵著像今日恁个好天氣，打早即會有三、四隻大鷄婆，在四脣个山嶼飛啊飛。

和阿權哥个嘴鼓都猶言答煞，聽著遠遠个所在傳來「咻！咻！」个聲，鷄婆出來啊！阿權哥睜著鷄婆出來，要緊个山園事頭嘛放落，跔一陣來鬥接梨个工人，坐在僕工寮个蔭影<sup>2</sup>下欣賞這齣大自然个表演。

睜佢人展開長長个翼胛、利用熱氣，慢慢踅、款款子盤，越

踅越高、若盤若遠，到尾變做天嶼个一粒烏點，親像優雅个天嶼王者，對天嶼睜落佢人守護个土地。

一半下，會睜著佢人胸蹬蹬、目直直歇在脣頭个樹桿面上，好定泥無聲無說即從落，一矚目轉身又飛向上，尖尖利利个爪，夾著一尾堵著否運个蛇，即歸路「咻！咻！咻！」風神喋喋飛入密密个樹林內底。

又有時務，睜佢人在高高个天嶼迴來迴去，好定泥，兩裡翼胛一收，對天嶼直直墜落，僕心肝內猶想：「這隻鷄婆這下包穩死無命啊！」毋過，睜佢硬硬討撞著泥下，翼胛一展、利爪一伸，黏時討頓恬个一矚目時間，佢遐雙利爪，毋知哪時捉著一隻臘身猶在扭啊扭个大隻老鼠，一轉身又飛到半天高啊！

歸陣人睜鷄婆表演睜到嘴擘擘，有人講：「難怪，在這林園做恁久个事頭，罕得睜著蛇，即係有這兜鷄婆守護這兜土地，蹤在這四角輪轉个老嫩大細正有通安心生活啊！」

<sup>1</sup> 鷄婆嘴：音 rhiō` poo` zhe`；東勢東方山峰名，華語稱鳶嘴山。

<sup>2</sup> 蔭影：音 rhim` rhang`；陰影。

【蔗下个蟬】羅紫云原作

屋脊遐蕪白蔗，種幾下年啊真大蕪，斬莫又會擋暴穎生到青  
拚拚，闊目<sup>1</sup>多汁，清甜好食。

逐年大約到五月開始，逐日到偎暗，即會有一陣著青衫，真  
靚真得人惜頭大尾尖翼長个草蟬，細細像手指尾恁大隻定，黏在  
這長長青色个蔗葉下，出力像在遐唱歌弄曲，鬧熱滾滾。佢人總  
係唱著：「炎炎兒<sup>2</sup>——炎炎兒——」甜甜个歌聲，一直到下晝兩  
點外正會煞棚<sup>3</sup>，歸下無喝慄。

草蟬下班了後烏蟬<sup>4</sup>跨个上棚，毋過，烏蟬係黏在白蔗脊遐另  
另个苦棟樹棟，佢算係頭大隻个蟬，臃身著一身烏色个西裝真顯  
目，大聲唱佢人个愛戀歌：「蟬<sup>5</sup>——蟬蟬蟬——蟬——蟬蟬蟬——」  
佢人攏背一臺自家做個放送頭，遐聲音放送到真遠都聽會  
著。佢心情好個時務，即阿腦佢人唱歌真好聽，心情無好個時又  
感覺佢人注死耳鼻。毋過一想著佢人來到這世間，正有短短幾下

<sup>1</sup> 閼目：音 lang` hm`；指甘蔗目與目的距離比較長，代表長得很好。

<sup>2</sup> 炎炎兒：音 rhiam rhiam rhi；草蟬的叫聲。借字。

<sup>3</sup> 煞棚：音 sad` pang`；結束。

<sup>4</sup> 烏蟬：音 bbu` hiam`；此指臺灣熊蟬。

<sup>5</sup> 蟬：音 hiam`；此指臺灣熊蟬的鳴叫聲。

日，就真佩服佢人恁勇敢認真打拚个精神，來完成唯一愛做個事——傳宗接代，遐即無麼个好怨嘆，嘛原諒佢人个大聲野喲啊。

在這鬧熱個時務，佢人擔凳恬恬坐在蔗脣詳細聽，猶會發現佢人毋係儘採唱个哦，知照順序有條理，有時獨唱有時合唱輪個來，像有人指揮，聲音有清亮、低沉、有時大有時細，發出個聲無幾共樣，有个較尖有个較溫柔。其實，蟬有真多種，有一年、三年、五年、十三年、十七年，長年攏躰在泥底不見天日。在隱居個泥底，培養破土個熱情；在多年個等待，化泥底能量做聲量，衝破重圍，就為著這短短幾下日個自由飛出。

佢心肝底直直想：這蕪蔗無落肥，敢係因為聽了蟬熱情清亮個歌聲，正越生越高越弓？恁個，嘛愛像蟬恁知足，知恩圖報，逐日歡頭喜面，這一世人就多姿多彩啊！

【虎頭蜂叮著記】李政瞰原作

得虎頭蜂叮著啊！

遐日晨早去山底巡水做事，無睜著路脊个竹林面上有大個蜂  
藪，嘛無細義撞著<sup>1</sup>遐支竹篙佢人即尋著佢。惡豺豺<sup>2</sup>个蜂黏時即飛  
在佢四輪轉，對佢臉身黏過來。佢捱著一隻睜，知係虎頭蜂即驚  
著攔緊走，著面退著面捱臉身和頭那毛面上个蜂。退到無蜂个所  
在正感覺頭那浮浮人怪怪，緊行轉屋下討歇一下。

無幾久佢頭那殼、臉身、手髀和脅下開始作掙會疾：頭那殼  
感覺即像雲漂在天棟，又得人縐躡浮浮腫腫擋縮縮，頭那暈暈<sup>3</sup>無  
法度思考。倒手手婆膨到像龜版，手痺痺、手指尾會伸毋會勾；  
坐毋會核<sup>4</sup>睡毋會去，唉唉唧唧真成艱難。哪係有陰間，遐個時  
佢應該係躡在內底。

落尾得人送去病院掛急診，講著有十外隻个蜂叮著佢了後，  
醫生真認真對佢講：普通來講虎頭蜂叮著二十針以上即可能有生

命危險，這款个蜂無解毒个血清，較嚴重有時務會引起過敏性休  
克抑係溶血个症頭，頭好愛先通知你屋下底个人。醫生安排吊大  
筒<sup>5</sup>、注射和抽血，交代佢先歇睏，若有麼个無堵好愛黏時講。

等佢略略睡一斂了後，感覺好真多即想討轉去。毋過醫生愛  
佢加歇一下觀察睜望，頭好等屙尿个尿水色正常，若係變烏暗泥  
色即較麻煩愛送大間病院。愛擋等一下，無麼個問題正會用出  
院。頭尾攏無問題醫生猶係掛心講：「開个藥愛照三頓食，有麼  
个無快活即愛擋緊過來哦。」

轉屋下換衫褲正知攏總叮著十六針，兩隻手髀發癢紅腫，真  
成癢。倒手婆猶係紅腫無感覺、頭那暈暈想討睡。睡到半夜直直  
爪，癢到硬討拋皮掀開、爪入骨頭髓去。食藥、抹藥無麼个效。

這滿蜂叮个所在結疤啊，睜著這兜堅疤即擋一擺得佢想著：  
遐個時務遐兜蜂，佢一個人在山底有幾危險。

<sup>1</sup> 撞著：音 dung choo；接觸、碰到某物。

<sup>2</sup> 惡豺豺：音 oo` sai` sai`；很凶惡的樣子。

<sup>3</sup> 頭那暈暈：音 teu` na` hin` hin`；頭暈暈的、頭暈目眩的樣子。

<sup>4</sup> 坐毋會核：音 coo` m` bboi hed`；坐不住。

<sup>5</sup> 吊大筒：音 deeu` tai tung`；吊點滴。

編號 6 號

## 【金黃色个旅行】曾雪蓉原作

旅行係一種真好个休閒活動，會用得人个心情鬆爽，加頭靚个回憶留落來，另外旅行嘛係一種學習，有一句事講：「行萬里路，贏過讀萬卷書」，在旅行个時務，沿路睜著个、聽著个，可能比在書內底學著个猶較精彩、心色。

在印象內底，𠂇頭懷念个一擺旅行，係前幾下年悞八月半个時，爺哀渡歸屋下人去花蓮寮。

𠂇人來到花蓮富里个六十石山，歸路感覺花蓮个空氣特別好，一聲又一聲大鵠婆歡喜又自在个歌聲，響在彎彎幹幹个山路，佢人在高高个雲嶺迴來迴去，展開大大个翼，無分日夜在這片山頭巡邏，佢人係這片天地个山大王，嘛係保護者。

等阿怙加車歇在忘憂亭，𠂇一落車即睜著滿山坪个金針花開到鬧鬧、真顯目，想起識在電視睜過一個紹介花蓮金針山個節目，講這跡位係一個靚到會得人「起童」个所在，這句事正經半點都毋會差；𠂇企在這高高涼亭个時，睜著歸片个山頭，變成金黃色个世界，當合著泥香、野花香个山風對面吹過來遐下，毋知仰子，𠂇个心肝頭有一種感動擋有幸福个感覺，𠂇想這即係大自

然个力量。

阿怙講：「前人種樹後人涼，前人種竹後人搖」，這山頭个金針花，係真多前人開山打林開墾出來个，所以來到這遊寮个時，愛知寶惜，毋單加這個美景用相片隨轉屋下，嘛愛加自家个垃圾處理好，恁年年正會有靚靚个風景好欣賞啊。

當夕陽像一粒深紅个柑子，掛在天凍个時，本來開到真有精神个金針花，像約定好共下下班个樣，攏目珠眨眼相偎湧，恬恬仔睡去啊；難怪金針花又喊做「一日美人」，佢跨日頭起來又在日頭落山个時，合起佢錫人个花蕊衫裙，做一個靚一日个美人。

時間過去真久，一半下𠂇猶係會想起遐擺「金黃色个旅行」，親像又聽著大鵠婆歡喜个歌聲，真久……真久。

編號 7 號

## 【頭風神个社團活動】劉純汝原作

兩年前正開學個時務，提著社團選單，哇！一拖拉庫<sup>1</sup>呢，有服務隊、排球隊，擋有童軍團、熱舞社……，遐時，毋知選哪個正好？欸！「西洋劍隊」佢目珠一金，仰子恁風神个名咧？「嗯，即選你啊！」

這下想起入團隊个第四個月，佢總算有機會參加全國比賽。換佢上場啊——劍衫揪好勢，面罩和手套嘛戴好勢，夾起電衫跔正馬步，盡拚啊！比賽一開始，佢擎劍出力滑步搶前進攻，出蠻力拂啊拂。哪會知，佢長刺佢撥擋、佢飛刺佢敲劍……，阿依哦！總係得佢閃利利，戰術嘛得佢瞪透透！佢个心肝著掣<sup>2</sup>，手腳亂了了，節奏嘛亂去啊；對手密密咻！咻！咻！咻，佢嘎直直揮空直直失分，輸到慄慄慄！

佢一比煞，軟摺摺個雙腳好定泥跪落地，賠命个「啊」一聲，即像無氣無脈个鬥雞，失志失志！原本个自信驚係走到天嶼和白雲賞藏膨嬰去啊！

貼心个劍隊伴，歸下攏行偎佢——有人送涼水、有人春背脊

<sup>1</sup> 拖拉庫：音 too' la ku^；語源於日語「 トラック 」，卡車，此文形容很多之意。

<sup>2</sup> 著掣：音 choo cheed'；指心裡很著急。

餅、擋有人拏佢攬縮縮，教練嘛款款安慰佢講：「人生有時星光有時月光，你打到真慶，後次擺正擋加油！」目汁強強會忍毋會核佢，深深感受著佢人親像寒天个細粒日頭，得佢黏時燒暖燒暖！

人講「臺嶼三分鐘，臺下十年功」正經有影。聽起來恁風神个「西洋劍」，做起來無恁快！除了考反應、比體力，猶愛揭頭腦、想戰術。這兩年來，一擺又一擺毋係你贏即係佢輸個比賽，得佢學習著：仰子面對失敗、仰子面對無厲害个自家，面對問題、解決問題！佢真煞作打拚，發揮客人硬頸精神个本等，練好基本功，抓捉要領；十年接一劍！佢個劍術越來越進步啊，武藝比得古代个花木蘭哦！

「西洋劍」係源自十七世紀個歐洲，嘛係奧運項目之一；有分鈍劍、銳劍、軍刀三種，競賽員在比賽個時，企在鐵枋面上个兩裡準備，用劍頭先刺著對手有效個部位即算得分，嶄然有速度感和爆發力。

「西洋劍」毋單培養專注力、思考力，擋有觀察力和判斷力，猶係「頭風神」個社團活動哦！

【礮塍下遐頭朶仔樹】徐秀英原作

躡在莊下，屋脣種幾下頭樣仔樹、牛眼、朶仔係真平常个，一到打子个季節，管佢有黃抑無黃，橫直會食个物件；細子絕對無放佢煞，若係吵著睡當晝个叔公叔婆，得佢人大聲攔，遐下晝即無戲好唱啊。

𠂌屋下即在伙房个盡尾，崎溜落就係礮塍，礮塍下个圳溝係細子熱天个天堂，泅水、戽魚、捉蝦、釣蝎子，想會著个齣頭，麼个攏提來賞！遐頭朶仔樹即對礮塍下个石壁逕出來。

阿媽真愛食這頭个黃朶仔，見睜著朶仔會食个遐駁子，佢就會擎杖子行偎來拏𠌂這兜細子講，青朶仔食了會屙丁屎，愛等佢黃正好食。細子嘴應講好，一陣楞豺狗哪！哪管會核佢人遐支嘴，幾下雙賤手捋會著个，歸下就捋來塞牙縫啊，除了生到盡樹尾捋毋會著个，阿怙就會擎竹篙叉去撙落來，較丁个佢會自家食莫，較黃个佢會圓在米缸內底，加翁兩日正提去阿媽間底，無牙个阿媽，食了，面上滿足个笑容，到這滿𠌂都猶記得。

遐頭朶仔樹棟，輒輒就會有唧噭丢仔飛來做藪。唧噭丢仔毋驚人，𠌂人在樹下賞扮家貨，佢在樹棟啾啾咁飛來飛去。細子雖

然番綻，毋過攏毋識去撞過佢个藪。較跋劇个會跋上石壁去算睜望，藪內底有生幾多粒卵。一駁子過後，樹棟又加幾下隻得人惜個細隻鳥，就恁生生不息。

樹棟嘛有膨尾鼠跳上跳落，猶有共樣毋驚人个赤龍公趕來趕去。膨尾鼠尾絨絨，真得人惜，屋下食伸个果子抑係果仁、果皮圓在樹下，佢人會輪个跳過來食，咕嚕嚕个目珠仁玲瓏楚，若像驚人來搶食，實在真心色。赤龍公即無恁得人惜啊，因為佢人个皮膚有保護色，得樹桿抑係燥葉遮躰个時，一無注意就會得佢嚇著，所以𠌂真感赤龍公。

恁多年過去啊，礮塍下遐頭朶仔樹早即無在啊，毋過，遐童年个回憶，長久就恁香甜个圓在𠌂心肝底。